

清

史

稿

清史稿

列傳一百二十四

盧焯

圖爾炳阿

阿思哈

宮兆麟

楊景素

閔賜元

盧焯字光植漢軍鑲黃旗人入資授直隸武邑知縣縣舊有均徭錢供差費遇差仍按里派夫焯革除之又歸火耗於公捕盜尤力雍正六年解餉詣京師世宗特召對遷江南亳州知州禁械鬪再遷山東東昌知府總督田文鏡遣官弁四出訪事東昌民逮下獄甚衆焯至悉判遣之會有水災焯疏運河築護城長堤動帑賑恤上遣大臣閱視獨東昌得完九年遷督糧道移河南南汝道十年授按察使十一年遷布政使十二年擢福建巡撫賜孔雀翎十三年高宗卽位焯疏言被水州縣不成災上諭曰被水雖不成災仍須加意賑恤毋使小民失所乾隆元年請查丈建陽民田上諭曰小民畏查丈如水火汝初爲加賦起見今又以豁除掩非一存觀望之心所謂無一而可也尋奏減邵武永安所徵浦

福寧衛屯田徵米科則豁閩侯官諸縣額缺田地又以平和永安清流諸縣田少丁多請減免攤餘丁銀又奏教民蠶績疏濬省會城河三年調浙江巡撫兼鹽政奏請停仁和海軍二縣草塘歲修銀減嘉興屬七縣銀米十之二又奏陳鹽政諸事請禁商人短秤飭州縣捕私鹽毋擾民毋捕肩挑小販鹽場徵課不得刑比上諭曰所奏各條皆是汝先過刻茲乃事事以寬沽名過猶不及汝其識之尋請裁鹽場協辦鹽大使改海軍草塘爲石塘旣又請濬備塘河運石五年上諭曰盧焯至浙江沽名邀譽舉鄉賢名宦絡繹不絕海塘外已漲沙數十里焯旣請停草塘歲修又請改建石塘心無定見惟事揣摩已彰明較著矣六年左都御史劉吳韻劾焯營私受賄上解焯任命總督德沛副都統旺札爾按治事皆實請奪官刑訊事連嘉湖道呂守曾嘉興知府楊景震守曾已擢山西布政使逮至浙江自殺杭州民數百爲焯訟冤毀副都統廳前鼓亭德沛等以聞上諭責辦理不妥七年議上焯景震皆坐不枉法贓擬絞八年焯以完贓減等戍軍臺十六年上南巡閱海塘念焯勞召還二十年授鴻臚寺少卿署陝西

西安巡撫二十一年調署湖北以陳宏謀代焯宏謀未至上命發歸化城米運金川餉軍急驛諭宏謀焯發視奏言歸化城雖產米路遠費重西安有貯米先發以餉軍仍請擅行罪上嘉焯知大體合機宜實授湖北巡撫二十二年西安布政使劉藻入覲言焯在西安入貢方物但量給薄值及調任湖北欲借庫帑未應付上責焯負恩奪官戍巴里坤二十六年召還三十二年卒

圖爾炳阿佟佳氏滿洲正白旗人初授吏部筆帖式累遷郎中乾隆三年授陝西甘肅道累遷雲南布政使十二年擢巡撫十五年永嘉知縣楊茂虧銀米圖爾炳阿令後政彌補結案總督碩色論劾上責圖爾炳阿欺隱徇庇奪官逮京師下刑部治罪坐監守自盜擬斬監候十七年上以圖爾炳阿贓未入已釋出獄授吏部員外郎未幾授河南布政使調山東又復還河南二十年擢巡撫二十二年上南巡江蘇布政使夏邑彭家屏以病告家居覲徐州行在入對言鄉縣被水上詔圖爾炳阿圖爾炳阿奏收成至九分上責圖爾炳阿文過圖爾炳阿又奏去歲被水尙未成災上斥爲怙惡不悛遣員外郎觀音保密察災狀得

實上奪圖爾炳阿官發烏里雅蘇臺効力上發徐州夏邑民張欽劉元德詣行在訴知縣係默諱災及治賑不實上親鞫元德言諸生段昌緒指使上復遣侍衛成林會圖爾炳阿至夏邑按治於昌緒家得傳鈔吳三桂檄上諭曰圖爾炳阿察出逆檄緝邪之功大諱災之罪小且以如此梗不知化之民而治其司牧者以罪是不益長澆風乎免圖爾炳阿罪仍留巡撫任治賑圖爾炳阿若因有前此罪斥之旨心存成見或不釋然於災民則是自取罪戾亦不能逃朕洞鑒尋家屏亦以藏禁書罪至死圖爾炳阿仍以匿災下吏議奪官命留任逾數月召詣京師命往烏里雅蘇臺治饑二十八年授貴州巡撫二十九年調湖南三十年病作遣醫往視卒

阿思哈薩克達氏滿洲正黃旗人自官學生考授內閣中書累遷刑部郎中充軍機處章京乾隆十年擢甘肅布政使十四年擢江西巡撫疏言各營操演槍礮須實子彈營馬應令騎兵自飼技藝以純熟得用爲要步法架勢不必朝更夕改上嘉其言得要旋調山西十六年平陽旱未親往撫卹詔責之十七年蒲

解等處復災請以平陽富民捐款解河東道庫加賑上諭之曰賑濟獨緩重者數百萬少亦數十萬悉動正帑從無顧惜富戶所捐幾何貯庫助賑殊非體制此端一開則偏災之地貧民既苦艱食富戶又令出資國家撫卹災黎何忍出此責阿思哈卑鄙錯謬不勝巡撫任召還奪官尋授吏部員外郎二十年命以布政使銜往準噶爾軍前經理糧運擢內閣學士二十二年命署江西巡撫蒞任清理屯田尋眞除學政謝澹生劾阿思哈婪賄派累命尙書劉統勳侍郎常鈞等按勘得實擬絞二十六年詔免罪以三品頂戴發烏魯木齊效力二十八年命往伊犁協同辦事二十九年授廣東巡撫調河南三十年疏言衛河運道淺阻濬縣三官廟老鵠銜諸地砂碭挺據河心重載尤艱浮送向於上下游淺處建築草壩以束水勢詳考河形夏秋水盛無須草壩冬令源澀草壩亦屬無益不如於上游先期蓄水臨時開放飭府縣督河員於九月望後起至漕船出境止暫閉外河以上民渠使水歸官渠重運自可疏通鑿去砂碭並集夫疏濬浮沙以利漕運又請借司庫閒款委員分購河工料物以除沿河州縣按畝派

果均報聞三十四年擢雲貴總督師征緬甸阿思哈出銅壁關至蠻暮軍中奏  
軍中糧馬不敷上責其畏難解任以副都統銜在領隊大臣上行走旋召爲吏  
部侍郎入對失上指奪官戍伊犁三十九年釋回仍充軍機章京擢左都御史  
大學士舒赫德師討王倫命阿思哈偕額駙拉旺多爾濟率健銳火營兩營以  
往事定拉旺多爾濟言城北搜剿王倫餘黨阿思哈未同往下吏部奪官命留  
任四十一年署吏部尚書旋授漕運總督卒賜祭葬諡莊恪阿思哈初撫江西  
上眷之獨厚廣西巡撫衛哲治入覲上問各省督撫孰爲最劣哲治引罪上謂  
姑置汝哲治舉阿思哈對時以爲難能

宮兆麟字伯厚江南懷遠人自貢生授湖北安陸通判累遷至山東糧道乾隆  
三十一年授湖南按察使桂陽州民侯七郎毆殺從兄嶽添賄其兄學添自承  
知州張宏燧讞上巡撫李因培疑之令兆麟詳鞫得實因培調福甌赴巡撫常  
鈞庇宏燧以七郎呼冤劾兆麟兆麟亦入奏上遣侍郎期成額會總督定長按  
治如兆麟讞兆麟又發宏燧買金行賄狀期成額等奏聞逮訊買金非行賄乃

迎合因培及湖北布政使赫昇額意指代武陵知縣馮其柘補虧空因培赫昇額常鈞宏燧皆坐譴三十三年兆麟調雲南按察使三十三年遷布政使擢廣西巡撫雲南軍營需硝敕兆麟籌畫兆麟以廣西舊存硝七萬七千餘斤運剿陞復撥通省營貯火藥二十萬斤繼運得旨嘉許調湖南三十五年又調貴州桐梓縣民爲亂命速赴任會湖廣總督吳達善捕治亂定古州黨堆寨苗香要等爲亂復偕吳達善督兵捕誅之兆麟奏黨堆寨苗老的以阻香要亂被殺令卽寨立廟以祀良苗並將死義被旌及香要等叛逆伏誅狀譯苗語榜廟門俾令警戒並請移駐將吏建下江營土城駐兵鎮撫是夏兆麟奏請於鄰省湖南四川廣西買米運貴州糶濟至秋豐收復奏請停運上斥其冒昧勅令詳慎兆麟復奏請簡發知府三員赴貴州上以此端一開各省效尤妨吏部選法且開倖進之門下旨嚴飭會貴州布政使觀音保入覲計兆麟繼率喜自誇口給便捷人號爲鐵嘴上曰觀音保人已繼率今尙以兆麟爲繼率則繼率更甚可知諭兆麟猛省痛改尋詔詣京師降補甘肅按察使三十六年坐貴州任內失察



廠員虧欠鉛斤奪官四十一年東巡兆麟迎駕詔與三品銜四十六年卒

楊景素字樸園江南甘泉人提督捷孫父鑄古北口總兵景素孱弱不好章句貧不能自給入資授縣丞發直隸河工效力乾隆三年補蠡縣縣丞累遷保定知府十八年授福建汀漳龍道漳浦民蔡榮祖欲爲亂景素率營卒禽斬之調臺灣道釐定漢民墾種地並生熟畝界址革游民爲通譯而不法者代以熟番又禁入山採木借修造戰船材料爲名累諸番三十三年授河南按察使三十五年擢甘肅布政使調直隸命從尙書裘曰修勘察堤埝各工坐失察雄縣知縣胡錫瑛侵蝕災賑下吏議奪官命留任俟八年無過方准開復三十九年壽張民王倫爲亂大學士舒赫德督兵討之上命景素具車馬濟師令分守河西賊以糧艘結浮橋欲渡景素與總兵萬朝興副將瑪爾當阿等督兵禦之董勸回民助師夜焚橋賊不得渡事旋定擢山東巡撫疏請編查保甲四十年疏請選京師健銳火器營裨佐發山東司營任教演四十一年上東巡臨視臨清燬橋斷道及亂民竄據所在景素巡當時戰狀上嘉其勞賜黃馬褂汝上宋家窪

舊渠淤墊諸水淹民田四十二年景素奏請濬舊渠並開支河二令仍趨南陽  
昭陽二湖下部議行擢兩廣總督四十三年調閩浙疏言浙西歉收總督楊廷  
璋請撥臺灣倉穀十萬接濟北風盛發未能卽到請於福州福寧興化泉州四  
府屬撥倉穀十萬聽商運赴嘉湖出糶仍飭臺灣運歸四府補倉得旨嘉獎四  
十四年調直隸薦于易簡爲布政使上以易簡爲大學士敏中弟貴景素十二  
月卒贈太子太保賜卹如例四十五年兩廣總督巴延三奏景素操守不謹並  
發官兵得賊縱盜狀兩江總督薩載勘有河隄城垣工程罰景素家屬承修福  
康安又奏景素在兩廣婪索商捐六萬餘責景素子炤限年繳還五十四年以  
福建吏治廢弛追咎景素成炤伊犁五十九年釋回

閔鶚元字少儀浙江歸安人乾隆十年進士授刑部主事再遷郎中督山東學  
政二十七年自學政授山東按察使調安徽遷湖北布政使調廣西江寧四十  
一年遷安徽巡撫四十四年雲貴總督李侍堯以賊敗罪至斬下大學士九卿  
議請從重立決復下各省督撫議咸請如大學士九卿議鶚元窺上指欲寬侍

堯獨奏言侍堯歷任封疆勳幹有爲中外推服請用議勳議能例稍寬一線上從之侍堯得復起四十五年調江蘇四十六年甘肅布政使王賢望坐僞災冒賑得罪事連鶚元弟同知鶚元上責鶚元隱忍瞻徇知其事而不舉降三品頂戴停廉俸四十八年還原品頂戴支廉俸如故五十年江南旱五月鶚元奏准徐海三府如得雨二三寸猶可種雜糧上諭曰得雨二三寸未爲霑足焉能種雜糧地方雨水民瘼攸關鶚元何得含混入告尋奏請截漕十萬石准徐海三府州被災較重碾米治賑如所議行五十五年高郵巡檢陳倚道察知書吏僞印重徵知州吳瑛置不問牒上鶚元亦置不問揭報戶部上諮鶚元鶚元猶庇瑛不以實陳乃遣尙書慶桂侍郎王昶按治責鶚元欺罔奪官逮鶚元等下刑部治罪巡撫福崧劾鶚元得句容知縣王光陞牒發糧書侵那錢糧但令江寧府察覈上責鶚元玩視民瘼徇情似法命置重典獄具擬斬立決命改監候五十六年釋還里嘉慶二年卒

論曰法者所以持天下之平人君馭羣臣既知其不肖乃以一日之愛憎喜怒

屈法以從之此非細故也焯阿思哈景素坐貪皆勘實猶尙復起圖爾炳阿匿  
災至面諷反誅告者兆麟口給鸚元迎上指至不勝疆政而始去之高宗常謂  
朕非甚懦弱姑息之主不能執法執法固難自克其愛憎喜怒尤不易言也

清史稿

列傳一百二十五

塞楞額

滿州人

鄂昌

滿州人

彭家屏

李因培

常安

福崧

塞楞額瓜爾佳氏滿洲正白旗人康熙四十八年進士授內閣中書擢翰林院侍講四遷至侍郎歷刑兵禮諸部雍正二年出署山東巡撫入爲戶部侍郎如廣東按將軍李林縱部兵毀米廠閔巡撫署事竟仍署山東巡撫疏請以東平州安山湖官地分畀窮民栽柳捕魚爲業上許之並令發耗羨備用銀爲建屋製船又疏請浚柳長河開引河二疏積水復入爲工部侍郎緣事奪官乾隆元年賜副都統銜如索倫巴爾虎練兵尋授鑲藍旗漢軍副都統出爲陝西巡撫移江西疏請築豐城石隄封廣信府銅塘山均許之再移山東十一年擢湖廣總督十三年孝賢皇后崩故事遇國恤諸臣當於百日後薙髮錦州知府金文醇違制被劾逮下刑部擬斬候上以爲不當責尙書盛安沾譽予重譴江蘇巡

撫安甯舉江南河南總督周學健薙髮如文醇上並命逮治因詔諸直省察屬吏中有違制薙髮者不必治其罪但令以名聞是時塞楞額亦薙髮湖北巡撫彭樹葵湖南巡撫楊錫紱及諸屬吏皆從之得詔塞楞額具疏自陳上命還京師待罪諡謂文醇已擬斬決豈知督撫中有周學健則無怪於文醇豈知滿洲大臣中有塞楞額又無怪於學健因釋文醇寬學健皆發直隸以修城自贖樹葵錫紱誤從塞楞額錫紱並勸塞楞額檢舉皆貸罪令樹葵分任修城示薄罰塞楞額至刑部論斬決上謂祖宗定制君臣大義而違蔑至此萬無可恕以尙爲舊臣令宣諭賜自盡學健江西新建人雍正元年進士改庶吉士散館授編修五遷至戶部侍郎命如山東按事兩詣上下江會督撫治災振水利出署福建巡撫浙閩總督加太子少保授江南河道總督坐違制薙髮奪官命江西巡撫開泰籍其家開泰發其往來私書中有丁憂堯沂曹道吳同仁行賄學健乞舉以自代上爲罷陳舉自代例詔曰朕令大臣舉可以自代之人凡以拔茅茹顯俊乂之意也今同仁夙學健許以兩千朕不解焉問之錢陳羣始知爲昧夫

考績黜陟何可爲苞苴之門豈朕若渴之誠尙未喻於三三大臣耶朕甚惡焉其罷之別詔又謂學健卞急剛愎不料其不勵名檢竟至於此下兩江總督策楞覆勘具得學健營私受贓縱賊屬奴僕散法狀刑部引塞楞額及前步軍統領鄂善例論斬決上謂學健違制罪已貴婪賊黨破薦舉事視鄂善尤重賜自盡

鄂昌西林覺羅氏滿洲鎮藍旗人大學士鄂爾泰從子也雍正六年以舉人授戶部主事七年超擢陝西甯夏道十年遷甘肅布政使十一年署陝西巡撫旋授四川巡撫酉陽州土司冉元齡老病子廣烜襲土民苦其貪暴鄂昌奏請改土歸流十三年總督黃廷桂劾鄂昌貪縱命奪職以楊秘代之遣刑部侍郎申珠渾會秘按治得鄂昌枷斃罪人及受屬吏銀瓶諸狀命逮下刑部論杖徒遇赦免乾隆元年令在批本處行走二年授直隸口北道邊甘肅按察使山西民梁玘等在高臺遇盜死知縣伍昇堂捕良民煅煉論罪鄂昌雪其冤得眞盜置之法巡撫黃廷桂疏陳鄂昌平反狀旨嘉獎九年遷廣西布政使十一年署廣

西巡撫疏請以鄂爾泰祀廣西名宦上責其私不許十二年疏自陳舉布政使李錫泰自代上復責其朋庇因命督撫不得舉本省藩臬自代著爲例迭移江蘇四川甘肅諸省署甘肅提督陝甘總督復移江西巡撫時傳播尙書孫嘉淦疏稿有誣謗語命諸行省究所從來鄂昌以坐展饒九南道施廷翰子奕度逮下刑部鞫無據雪其枉召鄂昌詣京師待命獄定誅千總盧魯生責鄂昌誤讞下刑部論杖徒命貸罪發往軍臺效力十九年閏四月命以甘肅貯官茶發北路軍備用命鄂昌董其事旋授甘肅巡撫理軍需內閣學士胡中藻著堅磨生集文辭險怪上指詩中語訕上坐悖逆誅中藻故鄂爾泰門人鄂昌與唱和上命奪職逮至京師下獄大學士九卿會鞫籍其家得所著塞上吟語怨望又聞鄂容安從軍輒云奈何奈何上責以失滿洲踴躍行師舊俗又得與大學士史貽直書稿知貽直爲其子奕箚請託上爲罷貽直諡鄂昌負恩黨逆罪當肆市但尙能知罪又於貽直請託狀直承無諱朕得以明正官常從寬賜自盡中藻江西新建人乾隆元年進士上舉其詩有曰又降一世曰亦天之子曰與一世



爭在醜夷無慮數十事語悖慢又有西林第一門語斥其攀援門戶恬不知恥因及鄂爾泰及張廷玉秉政各有引援朋分角立謂如鄂爾泰猶在當治其植黨之罪命罷賢良祠祀鄂樂舜亦鄂爾泰從子初名鄂敏雍正八年進士改庶吉士授編修秋職侍郎刑部侍郎王國棟放縱愆儀上命之退鄂敏未引去因以責鄂敏奪官逾年復編修出爲江西瑞州知府累遷湖北布政使命更名鄂樂舜遷甘肅巡撫請疏茶引備安西五衛積貯移浙江修海塘皆議行尋移安徽又移山東未行浙江按察使富勒渾密劾鄂樂舜在浙江時布政使同德爲婪索鹽商銀八千命侍郎劉綸浙閩總督喀爾吉善按治綸等言鄂樂舜實假公使銀上又命兩江總督尹繼善會鞠得婪索鹽商狀如富勒渾言但無與同德事鄂樂舜論絞富勒渾亦坐誣治罪上以定擬失當擯富勒渾布政使逮鄂樂舜至京師賜自盡時後鄂昌死未一年也

彭家屏字樂君河南夏邑人康熙六十年進士授刑部主事累遷郎中考選山西道御史外授直隸清河道三遷江西布政使移雲南再移江蘇以病乞罷乾

隆二十二年春高宗南巡家屏迎謁上諮歲事家屏奏夏邑及隣縣永城上年被水災獨重河南巡撫圖爾炳阿朝行在上以家屏語詰之猶言水未爲災上命偕家屏往勘又以問河東河道總督張師載師載奏如家屏言上謂師載篤實語當不誑飭圖爾炳阿秉公勘奏毋更迴護上幸徐州見飢民困苦狀念夏邑永城壤相接被災狀亦當同密令步軍統領衙門員外郎觀音保徵服往視上北還發徐州夏邑民張欽遮道言縣吏諱災上申命圖爾炳阿詳勘次鄰縣夏邑民劉元德復訴縣吏施賑不實上不懌詰主使元德舉諸生段昌緒命侍衛成林監元德還夏邑按其事而觀音保還奏夏邑永城虞城商邱四縣災甚重積水久田不可耕災民鬻子女人不過錢二三百觀音保收災民子二以其券呈上上爲動容詔舉其事謂爲吾赤子而使骨肉不相顧至此事不忍言因奪圖爾炳阿職戍烏里雅蘇台諸縣吏皆坐罪成林至夏邑與知縣孫默召昌緒不至捕諸家於臥室得傳鈔吳三桂檄以聞上上遂怒貸圖爾炳阿遣戍及諸縣吏罪令直隸總督方觀承覆按召家屏詣京師問其家有無三桂傳鈔檄

及他禁書家屏言有明季野史數種未嘗檢閱上責其辭遁命奪職下刑部使侍衛三泰按驗家屏子傳笏慮得罪焚其書命逮昌緒傳笏下刑部誅昌緒家屏傳笏亦坐斬籍其家分田予貧民圖爾炳阿又以家屏族譜上譜號大彭統記御名皆直書不闕筆上益怒責家屏狂悖無君卽獄中賜自盡秋讞刑部入傳笏情實上以子爲父隱貸其死上旣譴家屏等召圖爾炳阿還京師逮獄下刑部命觀音保以通判知夏邑手詔戒敕謂刁頑旣除良懦可憫當善爲撫綏毋俾災民失所也

李因培雲南晉甯人乾隆十年進士改庶吉士散館授編修十三年特擢翰林院侍講學士督山東學政十四年再擢內閣學士十八年署刑部侍郎兼順天府尹蝗起因培劾通水道王楷等不力捕皆奪職又劾涿州知州李鍾俾虧倉穀論罪如律衡水知縣劉士玉因培鄉人也以賄敗爲直隸總督方觀承論劾冀州知州誇喀謁因培因培稱士玉冤誇喀因爲申布政按察兩司十九年直隸布政使王麟以其事聞因培坐奪職甫三月起光祿寺卿復督山東學政二

十一年移江蘇二十四年遷內閣學士學政任滿移浙江二十七年任又滿復移江蘇上三巡撫賦詩以賜二十八年授禮部侍郎尋改倉場侍郎皆留督學二十九年授湖北巡撫皆上諭湖廣總督吳達善曰因培能治事學問亦優但未免恃才好居人上今初任民事汝當留意治事有不當善規之不聽卽以聞朕久未擢用亦欲折鍊其氣質今似勝於前但恐志滿易盈負朕造就耳旋移湖南三十一年又移福建將行常德被水上令速予災民一月糧詔未至因培令秋後勘災如故事上責因培以將受代五日京兆不恤民瘼下部議當降調甫兩月授四川按察使因培在湖南日常德知府錫爾達發武陵知縣馮其柘虧庫帑二萬餘時因培報通省倉穀無虧慮以歧誤得罪示意布政使赫昇額令桂陽知州張宏燧代其柘償萬餘不足仍疏劾會宏燧讞縣民侯嶽添被殺誤指罪人爲按察使宮兆麟所糾因培及繼任巡撫常鈞覆讞不能決上命侍郎成額卽訊因得宏燧營私虧帑及承因培指代其柘償金諸狀以聞上命奪因培官逮送湖北對簿具服諭曰諸直省倉庫虧缺最爲鉅弊昔皇考嚴加

重戒侏批諭旨不管三令五申人亦不敢輕犯朕御極三十餘年有犯必懲乃近年營私飲法屢有發覺豈因稽查稍疏故能復作朕自愧誠不能感人若再不能執法則朕亦非甚懦弱姑息之主也則成額奏至因培下刑部論斬決上命改監候秋讞入情實賜自盡

常安字履坦納喇氏滿洲鑲紅旗人以諸生授筆帖式自刑部改隸山西巡撫署雍正初擢太原理事通判世宗時庶僚皆得上章言事常安疏請裁驛站館夫及諸官署鋌夫省科派從之尋擢冀甯道遷廣西按察使移雲南就遷布政使移貴州疏言苗疆多事由於兵役擾累嗣後有擾累事罪該管文武官下雲貴廣西總督議行遷江西巡撫十三年以母喪去官乾隆元年還京師舟經仲家淺其僕迫閘官非時啓閘越渡高宗聞之諭謂皇考臨御時所未嘗有徒以初政崇尚寬大常安封疆大吏乃爲此市井跋扈之舉目無功令下東河總督白鍾山按治奪官下刑部論罪當枷號鞭責命貸之往北路軍營董糧餉四年授盛京兵部侍郎內移刑部侍郎外授漕運總督內閣學士雅爾呼達請增遣

滿洲兵駐防口外直隸總督孫嘉淦疏請於獨石口張家口外擇可耕地屯兵招墾常安以爲侵蒙古游牧地疏請寢其事六年移浙江巡撫謝上因言屬吏賢否視上司爲表率惟有身先砥礪共勵清操上諭曰廉固人臣之本然封疆大臣非僅廉所能勝任爲國家計安全爲生民謀衣食其事正多觀汝有終身誦廉之意則非矣上念浙江海塘爲民保障詔訓近時狀並命閩浙總督那蘇圖杭州將軍傅森會常安詳勘常安等議海甯至仁和原有柴塘塘外臨水仿河工絡壩之法用竹簍盛碎石層層排築外捍潮汊內護塘基水去沙停漸有淤灘再用左都御史劉統勳議改建石塘別疏又言塘工可大可小大則終年興工亦難保其無虞小則應興則興應停則停惟期免於衝決是在因時損益不宜惜費亦不宜糜費乾隆四五年間所修石塘竭力督催明歲可望全完各塘不無闊狹高低必須整齊堅固臣諭督塘兵培補鑲墊俾塘有堅工兵無閒曠海甯塘後舊有土塘以備泛溢令民間栽柳根株盤結塘身枝幹藉資工用八年石工乃成常安在浙江久有惠政嘗川保甲法編太湖漁舟清盜源釐陳

浙甌政諸弊蘇商困以溫處二府貧瘠鮮蒸藏招商轉江蘇米自海道至佐民食江蘇巡撫陳大受疏論常安輕開海禁常安疏辨謂蘇視溫處彼此雖殊兩地皆皇上赤子大受不當過分畛域上諭曰汝等以此而矛盾皆爲民耳出於不得已以後豐年可不須若需穀孔亟當視此行耳常安巡視寧波沿海諸地泛海至鎮海又至定海疏陳內外洋諸島嶼狀謂內洋宜招民墾外洋宜封禁上嘉其衝冒風濤勤於王事嘉湖二府奸民迷誘民間子女常安督吏捕治悉獲諸奸民上令視探生折割例從重定擬飭常安寬縱尋上疏言州縣親民吏必於轄境事無繁簡地無遠近莫不深知而後有實政以及於民應飭於齋戒停刑暇日親歷鄉村以次而徧引其父老詢以疾苦於地方利弊了然胸中且籍以周知戶口如遇災賑董理易爲力上深然之錢塘江入海處近蕭山爲南大壑近海寧爲北大壑蜀山南別有中小壑舊爲江海匯流處漸淤塞水趨南大壑逼海甯九年尙書訥親莅視議復中小壑故道常安令就沙背爲溝四引潮刷沙歷數年沙漸去十一年疏言春伏兩汛已過南沙埧卸殆盡蜀山已

在水中倘秋汛不復湧沙大溜竟行中小疊矣上諭曰此言豈可輕出亦俟三  
五年後如何耳如能全行中小疊果可喜事也十二年閩浙總督喀爾吉善劾  
常安多得屬吏金婪索及於鹽政承差海關胥吏縱候取市肆珍貴物不予值  
凡十數事上命解任以顧琮代之令大學士高斌會顧琮按治常安亦疏劾布  
政使唐綏祖徇私狂悖上爲下高斌等併按高斌等按常安婪贓納賄狀皆不  
實惟縱僕得賤常安劾綏祖事盡虛疏請奪常安官上命大學士訥親覆按未  
至高斌等又言常安歲易鹽政承差有婪索狀訥親至又言常安嘗以公使錢  
自私按律擬絞下刑部卒於獄常安少受業於尙書韓菼工文辭有所論著多  
譏切時事其坐譴多舉細故遽從重比時論疑其中蜚語以死非其罪也

福松烏雅氏滿洲正黃旗人湖廣總督碩色係也乾隆中授內閣中書遷侍讀  
外授四川北道遷甘肅按察使再遷福建布政使未行蘇四十三亂作從總  
督勒爾謹討賊卽移甘肅事定賜花翎勒爾謹坐冒賑得罪命福松從總督李  
侍堯察通省倉庫虧銀八十八萬緡七十四萬有奇立例清償無力者以責上



官福崧亦應分償上特免之四十七年遷浙江巡撫上以王賈望陳輝祖相繼撫浙江皆貪吏復命察通省倉庫虧銀一百三十萬有奇立例清償如甘肅桐鄉縣徵漕不如律民聚鬩福崧令捕治因疏陳嚴除漕弊條四事下部議行四十九年上南巡兩浙鹽商輸銀六十萬以海甯范公塘改柴爲石福崧爲請上允之五十一年福崧以諸屬吏清償倉庫虧銀未能如期疏請展限並言於正歲集司道以下等官設誓共砥廉隅上以期已三四年乃復請展限非是且設誓亦非政體命尙書曹文植侍郎姜晟伊齡阿如浙江按治會福崧請籌柴塘修費上疑新建石塘無益勞民傷財令文植等併按召福崧還京師待命文植等疏陳浙江倉庫實虧數爲定善後章程別疏言柴塘坦水爲石塘保障宜有歲修上允其請察福崧無敗檢事失但在柔儒命署山西巡撫旋以浙江學政寶光劾劾平陽知縣黃梅貪黷論如律寶福崧未能發左授二等侍衛充和闐幫辦大臣五十二年移阿克蘇辦事大臣五十四年再移葉爾羌參贊大臣五十五年授江蘇巡撫署兩江總督還授浙江巡撫五十七年疏請補修海塘石

工與前巡撫琅玕改築柴場異議上命江蘇巡撫長麟往按請如福崧議浙江鹽道柴樞遷兩淮鹽運使虧帑私移兩淮鹽課二十二萬補之兩淮鹽政全德疏劾上以福崧領兩浙鹽政慮有染奪官以長麟代之命尙書慶桂會鞠謂福崧營索橫賦十一萬又侵公使錢六萬有奇獄具論斬逮致京師尋命卽途中行法福崧飲酖卒福崧爲巡撫治事明決御屬吏有法度民頌其治行其得罪死頗謂其忤和珅爲所陷尤慮至京師廷鞠或發其陰私故以蜚語激上怒迫之死云

論曰居喪不沐浴百日薙髮亦其遺意也塞榜額坐是中危法學健甦以他事誅然得罪仍在初獄鄂昌以門戶生恩怨家屏以措紳言利病皆足以援禍羅織文字其借焉者也因培起邊遠受岐捫屢躡屢起乃以欺罔傳重比常安福崧死於昧然封疆有政聲論者以爲冤事或然歟

清史稿

列傳一百二十六

恒文

字一麟 甘肅

高恒

字萬卿

王賈望

字勳 甘肅 通遠 陳縣 鳳

國泰

良卿

字世茂

錢度

覺羅伍拉納

滿洲

恒文烏佳氏滿洲正黃旗人雍正初以諸生授筆帖式四遷兵科給事中外授甘肅平慶道再遷貴州布政使乾隆初方用兵金川恒文奏言兵貴神速臣官甘肅平慶道時見提督以下諸營或三之一或四之一擇勇健者名為援剿兵將備預定旗幟器械及獎資諸項亦預存貴州乃無此例本年四川調兵二千遲至六日方得起程請倣甘肅例預為計提督駐安順設重兵請於府庫貯銀五千待用既又疏上行軍諸節目上嘉其能治事移直隸十六年擢湖北巡撫疏請採漢銅廣鼓鑄請增築武昌近城石隄請停估變省城道倉空廩備貯協濟鄰省米石均得旨允行十八年署湖廣總督移山西巡撫二十一年擢雲貴

總督二十二年三月疏劾貴州糧道沈遷婪索屬吏鞠實論斬恒文與雲南巡撫郭一裕議製金爐上貢恒文令屬吏市金減其值吏民怨咨一裕乃疏劾恒文貪污敗檢列欵以上上命刑部尙書劉統勳會貴州巡撫定長卽訊得恒文令屬吏市金減金值及巡察營伍縱僕婪索諸事逮送京師上責恒文爲大臣以進獻爲名私飽己橐篋不飭負恩罪大遣待衛三泰扎拉豐阿乘傳就恒文所至宣諭賜自盡郭一裕湖北漢陽人雍正初入貲爲知縣除江南清河知縣稍遷山西太原知府乾隆中累擢雲南巡撫恒文對簿具言貢金爐議發自一裕統勳等察知一裕亦令屬吏市金見恒文以減值歛怨乃先發爲掩覆計事聞上謂一裕本庸鄙前爲山東巡撫嘗請進萬金上供在官惟以殖產營運爲事但上不至如恒文之狼籍命奪職發軍臺効力手詔謂恒文及一裕罪輕重一歸允當毋謂一裕以漢吏劾滿洲終兩敗也一裕呈部請輸金贖罪會蔣洲楊瀕皆以婪索屬吏坐誅洲獄具得同官朋比狀上因謂恒文事發自一裕尙彼勝於此特許其納贖居數年予三品銜授河南按察使以老罷卒蔣洲江

南常熟人大學士廷錫子自主事累擢至山西布政使二十二年就遷巡撫旋移山東以塔永甯代塔永甯劾洲貪縱虧庫帑鉅萬將行令冀甯道楊龍文太原知府七賚扎諸屬吏納賕彌所虧統動自雲南還上命馳往會塔永甯按治解洲任逮送山西嚴鞫得實誅洲並及龍文七賚論絞候諸屬吏虧帑文職知州朱廷揚等武職守備武璉等皆論罪如律陝西巡撫明德以前官山西嘗取洲及諸屬吏賕亦論絞候上命發甘肅交黃廷桂聽差遣楊瀕直隸曲陽人乾隆中官湖南布政使時以湖南倉穀濟江南當糴補瀕發穀值百取一二得金三千有奇巡撫陳宏謀疏劾瀕實坐斬二十二年秋職巡撫蔣炳以瀕限內完贓擬入緩決上怒命誅瀕奪炳官逮京師論罪坐斬上以炳意在沽譽尙未嘗受賄改戍軍臺按察使夔舒亦坐是奪職

高恒字立齋滿洲鑲黃旗人大學士高斌子也乾隆初以蔭生授戶部主事再遷郎中出監山海關淮安張家口樵稅署長蘆鹽政天津總兵二十二年授兩淮鹽政江蘇巡撫陳宏謀疏言海州產鹽盛請令河東買運配引赴陝西引地

行銷淮北鹽賤並令淮南商買運適中之地作常平倉鹽備缺額補配命高恒會兩江總督尹繼善覆議尋疏陳海州產鹽盛衰視天時晴雨難定成數距陝西三千餘里黃河逆流而上斷難輓運自海州出場經淮徐海各屬皆淮北食鹽口岸徐州以上又係長蘆引地恐沿途挾私淮南額引多鹽場廣有盈無絀卽淮北鹽價稍賤加以脚費折耗亦相等若令淮南銷淮北餘鹽尤非商情所便縱發官帑與之收買亦難強其領運疏入上從之湖廣總督李侍堯疏言湖北鹽驟貴請飭淮商減價命高恒赴湖北會議定湖北鹽價視淮商成本每包以二錢三分一厘爲制二十九年授上駟院卿仍領兩淮鹽政三十年以從兄高晉爲兩江總督當迴避召署戶部侍郎疏陳整頓綱課定分季運清獎勵之制命以告後政普福尋授總管內務府大臣三十二年署吏部侍郎是時上屢南巡兩淮鹽商迎蹕治行宮揚州上臨幸輒留數日乃去費不貲類歲上貢稍華侈高恒爲鹽政陳請預提綱引歲二十萬至四十萬得旨允行復令諸商每引輸銀三兩爲公使錢因以自私事皆未報部三十三年兩淮鹽政尤拔世發

其弊上奪高恒官命江蘇巡撫彰寶會尤拔世按治諸鹽商具言頻歲上貢及備南巡差共用銀四百六十七萬餘諸鹽政雖在官久尙無寄商生息事上責其未詳盡下刑部鞠實高恆嘗受鹽商金坐誅普福及鹽運使盧見曾等罪有差子高樸初授武備院員外郎累遷給事中巡山東漕政三十七年超擢都察院左副都御史值月食救護未至上諭謂高樸年少奮勉是以加恩擢用非他人比乃在朕前有意見長退後輒圖安逸豈足副朕造就裁成之意吏議奪職命寬之遷兵部右侍郎上錄諸直省道府姓名密記治行優絀謂之道府記載太監高雲從偶泄於外廷左都御史觀保侍郎蔣榮吳壇倪承寬嘗因侍班私論其事高樸聞具疏劾上怒下刑部鞠治尋命誅雲從貸觀保等不竟其事詔謂雲從以賤役無忌憚豈可不亟爲整飭以肅紀綱但不屑因此興大獄故不復窮治諸大臣豈無見聞獨高樸爲之陳奏內省應自慚若因此圖傾高樸則是自取其死高樸若沾沾自喜不知謹懔轉致妄爲則高雲從卽其前車朕亦不能曲貸也四十一年命往葉爾羌辦事距葉爾羌四百餘里有密爾岱山產

王舊封禁高樸疏請開採歲一次四十二年阿奇木伯克色提巴勒底訴高樸役回民三千採玉婪索金寶並盜竊官玉烏什辦事大臣永貴以聞上命奪官嚴鞫籍其家得寄還金玉永貴又言葉爾羌存銀一萬六千餘金五百餘高樸坐誅方上誅高恒大學士傅恒從容言乞推慧賢皇貴妃恩貸其死上曰如皇后兄弟犯法當奈何傅恒戰栗不敢言至是諭曰高樸貪婪無忌罔顧法紀較其父高恒尤甚不能念爲慧賢皇貴妃姪而稍矜宥也

王亶望山西臨汾人江蘇巡撫師子自舉人捐納知縣發甘肅知山丹皋蘭諸縣選授雲南武定知府引見命仍往甘肅待闕除甯夏知府累遷浙江布政使暫署巡撫乾隆三十八年上幸天津亶望貢方物範金爲如意飾以珠上拒弗納三十九年移甘肅布政使甘肅舊例令民輸豆麥予國子監生得應試入官謂之監糧上令罷之旣復令肅州安西收捐如舊例亶望至申總督勒爾謹以內地倉儲未實爲辭爲疏請諸州縣皆得收捐旣又請於勒爾謹令民改輸銀歲虛報旱災妄言以粟治賑而私其銀自總督以下皆有分亶望多取焉議初



行方半載賈望疏報收捐一萬九千名得豆麥八十二萬上謂甘肅民貧地瘠安得有二萬人捐監又安得有如許餘糧今半年已得八十二萬年復一年經久陳紅又將安用卽云每歲借給民間何如留於閭閻聽其自爲流轉因發四不可解詰勒謹爾勒爾謹飾辭具覆上諭曰爾等旣身任其事勉力妥爲之可也四十二年擢浙江巡撫四十五年上南巡賈望治供張甚侈上謂省方問俗非爲游觀計今乃添建屋宇點綴鎔彩華縟繁費朕實所不取戒毋更如是賈望旋居母喪疏請治喪百日後留塘工自效上許之浙江巡撫李質穎入覲奏陳海塘事因及賈望意見不相合遂言賈望不遺妻孥還里行喪上降旨責其忘親越禮奪官仍留塘工自効四十六年命大學士阿桂如浙江勘工阿桂疏發杭嘉湖道王燧貪縱故嘉興知府陳虞盛浮冒狀上諭曰朕上年南巡入浙江境卽見其侈靡詰賈望言虞盛所爲令燧等借大差爲名貪縱浮冒必賈望爲之庇護命逮燧嚴鞫會河州回蘇四十三爲亂勒爾謹師屢敗亦被逮大學士阿桂出視師未卽至命尙書和珅先焉和珅疏言入境卽遇雨阿桂報師行

亦屢言雨上因疑甘肅頻歲報旱不實諭阿桂及總督李侍堯令具實以聞阿桂侍堯疏發賈望等令監糶改輸銀及虛銷賑粟自私請狀上怒甚遣侍郎楊魁如浙江會巡撫陳輝祖召賈望嚴鞫籍其家得金銀逾百萬上幸熱河逮賈望勒爾謹及甘肅布政使王廷贊赴行在令諸大臣會鞫賈望具服發議監糶改輸銀令蘭州知府蔣全迪示意諸州縣偽報旱災迫所轄道府具結申轉在官尙奢侈臬蘭知縣程棟爲支應諸州縣餽賂率以千萬計獄定上命斬賈望賜勒爾謹自裁廷贊論絞併命卽蘭州斬全迪遂令阿桂按治諸州縣冒賑至二萬以上皆死於是坐斬者棟等二十二人餘譴黜有差上謂此二十二人之死皆賈望導之使陷於法與賈望殺之何異令奪賈望子裘等官發伊犁幼子逮下刑部獄年至十二卽次第遣發逃者斬陝甘總督李侍堯續發得賕諸吏又誅閔鴻元等十一人罪董熙等六人五十九年上將歸政國史館進師傅上覽其治蹟乃赦賈望子還幼者罷勿遣謂勿令師絕嗣也勒爾謹宜特墨氏滿洲鑲白旗人乾隆初以繙譯進士授刑部主事遷員外郎外授直隸天津道累

遷陝甘總督四十二年河州回黃國其王伏林爲亂馳往捕治誅國其伏林及其徒四百餘人四十六年循化回蘇四十三復起勒爾謹令蘭州知府楊士璣河州協副將新村率二百人往捕爲所戕遂破河州勒爾謹赴援聞賊將自小道徑攻蘭州引還城守上責勒爾謹觀望失機奪官下刑部論斬上命改監候卒坐賈望獄死陳輝祖又以籍賈望家匿金玉器譴誅輝祖湖南祁陽人兩廣總督大受子也以蔭生授戶部員外郎遷郎中外授河南陳州知府累遷閩浙總督兼領浙江巡撫賈望獄起輝祖弟嚴祖爲甘肅知縣獄辭連染上以輝祖當知狀詰之不敢言詔嚴切乃具陳平日實有所聞懼嚴祖且得罪隱忍未聞上因請罪降三品頂戴留任時安徽巡撫閔鶚元亦坐其弟鵠元與輝祖同譴既布政使盛佳疏言檢校賈望家入官物與原冊有異同命大學士阿桂按治具得輝祖隱匿私易狀論斬上曰輝祖罪固無可道然與賈望較終不同傳云與其有聚斂之臣寧有盜臣輝祖盜臣耳亦命改監候四十七年浙江巡撫福崧奏桐鄉民因徵清聚衆闕縣庭輝祖寬其罪次年乃復闕浙閩總督富勒琿

奏兩省諸州縣虧倉穀福建水師提督黃仕簡奏臺灣民互鬪於是上罪輝祖牟利營私兩省庶政皆廢弛貽誤罪無異賈望賜自裁五十三年又以湖北吏治聞茸弊始輝祖爲巡撫時戍其子伊犁乾隆季諸貪吏首賈望次則鄭源璿源璿直隸豐潤人以貢生授戶部主事累遷湖南布政使仁宗旣誅和珅有言源璿貪婪狀下巡撫姜晟按治源璿具服收發庫項加扣平餘數逾八萬畧內眷屬幾三百人自蓄優伶服官奢侈上宣示源璿罪狀因言諸直省大吏宴會酒食率以屬首縣首縣復歛於諸州縣率皆朘小民之脂膏供大吏之娛樂展轉苛派受害仍在吾民通諭諸直省令悛改積習尋命斬源璿

國泰富察氏滿洲鑲白旗人四川總督文綬子也國泰初授刑部主事再遷郎中外擢山東按察使遷布政使三十八年文綬官陝甘總督奉命按前四川總督阿爾泰縱子明德布婪索屬吏徇不以實陳成伊犁國泰具疏謝請從父戍所贖父罪上諭曰汝無罪何必惶懼四十二年遷巡撫國泰執粉子早貴遇屬吏不以禮小不當意輒呵斥布政使于易簡事之諂至長跪白事易簡江蘇金

增人大學士敏中弟也大學士阿桂等以國泰乖張請改京朝官四十六年上  
爲召易簡詣京師問狀易簡爲國泰力辨上降旨戒國泰馭屬吏當寬嚴得中  
令警惕改悔會文綬復官四川總督以囑匪爲亂再戍伊犁國泰未具疏謝居  
月餘疏謝賜鹿肉上詰責國泰請納養廉爲父贖並乞治罪上寬之四十七年  
御史錢澧劾國泰及易簡貪縱營私徵賂諸州縣諸州縣倉庫皆虧缺上命尙  
書和坤左都御史劉墉按治並令澧與俱和坤故袒國泰墉持正以國泰虐其  
鄉右澧驗歷城庫銀銀色不一得借市充庫狀語互詳澧傳國泰具服婪索諸  
屬吏數輒至千萬易簡諂國泰上詰不敢以實對獄定皆論斬上命改監候逮  
繫刑部獄巡撫明興疏言通察諸州縣倉庫虧二百萬有奇皆國泰易簡在官  
時事上命卽獄中詰國泰等國泰等言因王倫亂諸州縣以公使錢佐軍興乃  
虧及倉庫上以王倫亂起滅不過一月卽謂軍興事急何多至二百萬卽有之  
富具疏以實聞國泰易簡罔上行私視諸屬吏虧帑愆置不問罪與王鳳奎等  
均命卽獄中賜自裁郝碩漢軍鑲黃旗人父郝玉麟官兩江總督郝碩麟都

尉世職授戶部員外郎直軍機處遷郎中外授山東登萊青道三遷江西巡撫將朝京師以行李不具徵屬吏納賕四十九年兩江總督薩載詢劾逮京師鞠實上謂郝碩罪同國泰小有才地方事尙知料理郝碩嘗朝行在問以地方事不知所對不意復貪婪若是且郝碩託辭求賂正國泰事敗時乃明知故蹈無復忌憚卽視國泰例賜自裁因通諭諸直省督撫當持名節畏憲典以國泰郝碩爲戒良卿富察氏滿洲正白旗人乾隆七年進士授戶部主事遷郎中外授直隸通永道累遷貴州布政使三十二年命署巡撫師征緬甸良卿董臺站上諭良卿師行供頓有資民力者覈實奏聞良卿疏言此項多鄉保措辦銀數多寡參差無從覈算上謂師行供頓有資民力亦當官爲檢覈若以鄉保措辦遂置不問民瘼何所仰賴且吏役因以爲姦又何所不至耶良卿以布政使署巡撫何得諉爲不知下吏議當降調命改奪官仍留任既上發帑佐軍需良卿請確查散給上詰良卿旣言無從覈算何能確查散給命留供續發官軍良卿又疏良陳貴州兵極能走險耐瘴請募五千人習槍礮懸牌備徵發上嘉其盡心

賜孔雀翎尋移廣東以募兵事未竟仍留貴州貴州產鉛歲採運供鑄錢以糧道主其事三十四年良卿疏劾威甯知州劉標運鉛不如額並虧工本運值奪標職令良卿詳讞良卿疏陳標虧項併劾糧道永泰請簡大臣會鞫上爲遣內閣學士富察善如貴州會良卿按治永泰揭戶部陳標虧項由長官婪索因及良卿及按察使高積貪黷狀上解良卿職復命刑部侍郎錢維城湖廣總督吳達善卽訊故事奏摺置黃木匣外護以黃綾袱至御前始啓上發副將軍阿桂軍中奏於袱內得普安民吳儂訴官吏土目私派累民狀命吳達善密勘而劉標亦遣人詣戶部訴上官婪索呈簿記上申命吳達善嚴鞫吳達善先後疏言標積年虧帑至二十四萬有奇良卿意在彌補掩覆見事不可掩乃以訪聞奏劾及追繳銀六千有奇令留抵私填公項不入查封始終隱飾又及高積寬儲庫水銀良卿有袒庇狀良卿長支養廉爲前布政使張逢堯及積署布政使時支放普安州民吳國治訴知州陳昶籍軍興私派累民良卿卽令昶會鞫不竟其事乃致使賄驛吏附奏事達御上乃責良卿負恩欺罔罪不止於飲法婪贓

命卽貴州省城處斬銷旗籍以其子富多富永發伊犂昇厄魯特爲奴積逢堯標皆坐譴方世僂字毓川安徽桐城人乾隆四年進士授戶部主事累遷太僕寺少卿外授陝西布政使二十九年擢貴州巡撫三十二年調湖南巡撫劉標訐發上官婪索言世僂得銀六千有奇上命奪官逮送貴州其僕承世僂得銀千獄成械致刑部論絞決上命改監候秋讞入情實伏法

錢度字希裴江南武進人乾隆元年進士授吏部主事累遷廣西道監察御史外授安徽徽州知府累擢至方面其爲江安督糧道河庫道皆再任歷十餘年上嘉其久任奮勉二十九年授雲南布政使三十三年遷廣東巡撫師方征緬甸度主餽軍命以巡撫銜領布政使未幾移廣西巡撫乃之官賀縣囚越獄度請寬知縣鄭之紳罪上命奪之紳職責度寬縱學政梅立本按試鬱林索供應民聚闕上命度定學政供應夫船事例度擬從寬備失上指仍左授雲南布政使三十七年監銅廠宜良知縣朱一深揭戶部告度貪婪勒屬吏市金玉上命刑部侍郎袁守侗如雲南會總督彰寶巡撫李湖按治貴州巡撫圖思得奏獲



度僕持金玉諸器自京師將往雲南值銀五千以上江西巡撫海明奏獲度僕携銀二萬九千有奇自雲南將往江南並得度寄子鄴書令爲複壁藏金爲永久計兩江總督高晉籍度家得窖藏銀二萬七千又寄顧金二千守伺等訊得度刻扣銅本平餘及勒屬吏市金玉得值具服逮送京師命軍機大臣會刑部覆讞以度侵欺勒索贓私具實罪當斬命卽行法子鄴亦論絞上爲改緩決尋遇赦仍不令應試出仕嘉慶五年弛其禁

覺羅伍拉納滿洲正黃旗人初授戶部筆帖式外除張家口理事同知累遷福建布政使林爽文之亂伍拉納主餽軍往來蚶江廈門事定賜花翎遷河南巡撫五十四年授閩浙總督上以福建民情熾悍戒伍拉納當與巡撫徐嗣曾商權整飭伍拉納督屬吏捕盜先後所誅殺百數十人以內地民多渡海至臺灣疏請海口設官渡便稽察時定往臺灣者出蚶江民舟或自廈門渡亦令至蚶江報驗疏請罷其例俾得逕出廈門言者以海中島嶼多流民散處爲盜較當燬其廬徙其民毋使滋蔓下濱海諸直省議伍拉納疏言福建海中諸島嶼流

民散處凡已編甲輸糧者當不在例中上命諸島嶼非例當封禁皆任其居處  
浙江嘉善縣民訴縣吏徵漕浮收下伍拉納按治論如律伍拉納治尙嚴疏勦  
金門鎮總兵羅英笈巡洋兵船遇盜不以實報英笈坐譴又論邵武營守備余  
朝武等侵餉營吏黃國材等冒餉黃巖右營守備葉起發屬兵遇盜不以實報  
外委陳學明避盜僞爲被創營兵柯大斌誣告營官皆傳重比五十七年同安  
民陳蘇老晉江民陳滋等爲亂設齋聚會離羣字妄造以代天地伍拉納率按  
察使戚蓼生赴泉州捕得蘇老等誅一百五十八人戍六十九人五十九年義  
烏民何世來宣平民王元樓德新等爲亂立邪教伍拉納率按察使錢受椿赴  
金華浙江巡撫吉慶已捕誅世來德新伍拉納覆讞諸脅從復誅鮑茂山吳阿  
成等還福建至浦城捕得元誅之六十年臺灣盜陳周全爲亂陷彰化伍拉納  
出駐泉州發兵令署陸路提督烏蘭保海壇鎮總兵特克什布赴勦彰化民楊  
仲舍等擊破周全亂已定是歲漳泉被水饑伍拉納至民間集乞賑未以聞上  
促伍拉納赴臺灣累詔詰責伍拉納自泉州往福州將軍魁倫疏言伍拉納性

急按察使錢受椿等迎合治獄多未協漳泉被水米值昂民貧巡撫浦霖等不爲之所多入海爲盜虎門近在省會亦有盜舟出沒上爲罷伍拉納浦霖命兩廣總督覺羅長麟署總督魁倫署巡撫伍拉納至臺灣劾鹿仔港巡檢朱繼功以喪去官賊起卽携眷內渡請奪官戍新疆上諭曰伍拉納爲總督臺灣賊起陷城戕官朕屢旨嚴飭始行繼功丁憂巡檢轉責其携眷內渡加以遠戍伍拉納畏憚遷延乃欲以此自掩何其不知恥也伍拉納浦霖貪縱婪索諸屬吏州縣倉庫多虧缺伍拉納嘗疏陳清查諸州縣倉庫虧穀六十四萬有奇銀三十六萬有奇限三年責諸主者償納至是魁倫疏論諸州縣倉庫虧缺伍拉納所奏非實數上命伍拉納浦霖及布政使伊轍布按察使錢受椿皆奪官交長麟魁倫按讞長麟魁倫勒布政司庫吏周經侵庫帑八萬有奇具獄辭以上上疑長麟等意將歸獄於經斥其徇隱長麟等疏發伍拉納受鹽商賕十五萬霖亦受二萬別疏發受椿讞長秦械闕獄獄斃至十人得賕銷案籍武拉納家得銀四十萬有奇如意至一百餘柄上比之元載胡椒八百斛籍霖家得窖藏金七

百銀二十八萬田舍值六萬有奇他服物稱是逮京師廷鞫服罪命立斬伊轍  
布亦逮京師道死受梃監送還福建夾二次重笞四十乃集在省諸官吏處斬  
又以長麟主寬貸奪官召還以魁倫代之遂興大獄諸州縣虧帑一萬以上皆  
斬誅李堂等十人餘譴黜有差霖浙江嘉善人乾隆三十一年進士授戶部主  
事再遷郎中外授湖北安襄鄖道累遷福建巡撫移湖南復遷福建及得罪上  
謂伍拉納未嘗學問或不知潔己奉公之義霖以科目進起自寒素擢任封疆  
乃貪黷無厭罔顧廉恥尙得謂有人心者乎霖及伍拉納伊轍布受梃諸子皆  
用王賈望例戍伊犁嘉慶四年赦還

論曰高宗譴諸貪吏身大辟家籍沒僇及於子孫凡所連染窮治不稍貸可謂  
嚴矣乃營私斂法前後相望豈以執政者尙貪侈源濁流不能清歟仰以坐苞  
苴敗者亦或論才宥罪執法未嘗無撓歟然觀其所誅極要可以鑑矣

清史稿

列傳一百二十七

王杰

董誥

朱珪

王杰字偉人陝西韓城人以拔貢考銓藍田教諭未任遭父喪貧甚爲書記以養母歷佐兩江總督尹繼善江蘇巡撫陳宏謀幕皆重之初從武功孫景烈游講濂洛關閩之學及見宏謀學益進自謂生平行已居官得力於此乾隆二十六年成進士殿試進呈卷列第三高宗熟視字體如素識以昔爲尹繼善繕疏曾邀宸賞詢知人品即拔置第一及引見風度凝然上益喜又以陝人入本朝百餘年無大魁者時值西陲戡定魁選適得西人御製詩以紀其事尋直南書房屢司文柄五遷至內閣學士三十九年授刑部侍郎調吏部擢左都御史四十八年丁母憂即家擢兵部尙書車駕南巡杰赴行在謝上曰汝來甚好君臣久別應知朕念汝然汝儒者不欲奪汝情歸終制可也服闋還朝五十一年命爲軍機大臣上書房總師傅次年拜東閣大學士管理禮部臺灣廓爾喀先後

平兩次圖形紫光閣加太子太保杰在樞廷十餘年事有可否未嘗不委曲陳奏和珅勢方赫事多擅決同列隱忍不言杰遇有不可輒力爭上知之深和珅雖厭之而不能去杰每議政畢默然獨坐一日和珅執其手戲曰何柔荑乃爾杰正色曰王杰手雖好但不能要錢耳和珅赧然嘉慶元年以足疾乞免軍機書房及管理部事允之有大事上必諮詢杰亦不時入告時教匪方熾杰疏言賊匪勦滅稽遲由被賊災民窮無倚賴地方官不能勞來安輯以致脅從日衆兵力日單而賊燄日熾此時當安良民以解從賊之心撫官兵以勵行間之氣三年之內川楚秦豫四省殺傷不下數百萬其幸存而不從賊者亦皆鋒鏑之餘男不暇耕女不暇織若再計畝徵輸甚至分外加派胥吏因緣勒索艱苦情形無由上達聖主之前祈將被賊地方錢糧蠲免不令官吏舞弊重徵有來歸者概勿窮治賊勢或可漸孤矣至於用兵三載未即成功實由將帥有所依恃怠玩因循非盡士卒之不用命也乞頒發諭旨曲加憐恤有驕惰不馴者令經略概行撤回或就近更調召募申明紀律鼓行勦戎庶幾人有挾纊之懼衆有

成城之志又言教匪之蔓延其弊有二一由統領之有名無實勒保雖爲統領而統兵大員名位相等人人得專摺奏事於是賊至則畏避不前賊去則捏稱得勝即如前歲賊竄興安領兵大員有匪已渡江五日地方官並不稟報之奏此其畏避情形顯而易見又如去歲賊擾西安城南殺傷數萬官兵既不近賊撫臣一無設施探知賊去已遠然後虛張聲勢名爲追賊實未見賊近聞張漢潮蔓延商維高均德屯據洋縣往來衝突如入無人之境秦省如此川省可知實由統領不專實罰不明之所致也一由領兵大員專恃鄉勇鄉勇陣亡無庸報部人數可以虛捏藉鄉勇爲前陣既可免官兵之傷亡又可爲異日之開銷此所以耗國帑而無可稽核也臣以爲軍務緊要莫急於去鄉勇之名而爲召募之實蓋有五利一民窮無依多半從賊苟延性命募而爲兵即有口糧多一爲兵之人即少一從賊之人一隔省徵調曠日持久就近召募則旬日可得一徵兵遠來筋力已疲召募之人不須跋涉一隔省之兵水土不習路徑不諳就近之人則不慮此一鄉勇勢不能敵則逃散無從懲治召募之兵退避則有軍

法具此五利何不增募一鼓而殲賊如謂兵多費多獨不思一萬兵食十月之糧與十萬兵食一月之糧其費相等而功可早奏也疏入並被採用二年復召直軍機隨扈熱河未幾因體疾詔毋庸入直先行回京三年秋川匪王三槐就擒封賞樞臣詔杰見雖未直軍機軍興曾有贊畫功並予優叙泊仁宗親政杰爲首輔遇事持大體竭誠進諫上優禮之五年以衰病乞休溫詔慰留許扶杖入朝七年固請致仕晉太子太傅在籍食俸八年春瀕行上疏略謂各省虧空之弊起於乾隆四十年以後州縣營求餽送以國帑爲資緣上司受其挾制彌補無期至嘉慶四年以後大吏知尙廉節州縣仍形拮据由於苦樂不均賢否不分宜求整飭之法又舊制驛丞專司驛站無可誅求自裁歸州縣濫支苛派官民俱病宜先清驛站以杜虧空今當軍務告竣朝廷勤求治理無大於此二者請容裁獨斷以挽積重之勢所言切中時弊上嘉納之陛辭日賜高宗御用玉鳩杖御製詩二章以寵其行有云直道一身立廊廟清風兩袖返韓城時論謂足盡其生平旣歸歲時頒賞不絕每有陳奏上輒親批答語如家人九年杰



與妻程並年八十命巡撫方維甸齋御製詩額珍物於生日就賜其家杰詣闕謝明年正月卒於京邸上悼惜賜金治喪贈太子太師祀賢良祠諡文端杰體不踰中人和藹近情而持守剛正歷事兩朝以忠直結主知當致仕未行會有陳德於禁城驚犯乘輿急趨朝請對曰德庖廚賤役安敢妄蓄逆謀此必有元奸大慙主使行明張差之事當除肘腋之患至十八年林清逆黨之變上思其言特賜祭焉係篤道光二年進士歷編修御史出爲汀州知府廣東督糧道署鹽運使時林則徐爲按察使治海防甚倚之募廣州游手精壯者備守禦以機敏稱擢山東布政使署巡撫失察家人屬官受賂連降罷職歸襄理西安城工卒贈布政使銜

董誥字蔗林浙江富陽人尙書邦達子乾隆二十八年進士殿試進呈卷列第三高宗因大臣子改二甲第一選庶吉士即預修國史三通皇朝禮器圖散館授編修三十二年命入懋勤殿寫金字經爲皇太后祝嘏次年大考翰詹因寫經未與試特加一級尋擢中允丁父憂三十六年服闋入直南書房初邦達善

畫受高宗知誥承家學繼爲侍從書畫亦被宸賞尤以奉職恪勤爲上所眷注累遷內閣學士四十年擢工部侍郎調戶部歷署吏刑兩部侍郎兼管樂部充四庫館副總裁接辦全書舊要命輯滿洲源流考四十四年命爲軍機大臣五十二年加太子少保擢戶部尙書臺灣廓爾喀先後底定並列功臣圖形紫光閣嘉慶元年授受禮成詔朱珪來京將昇以閣務仁宗賀以詩屬稿未竟和珅取白高宗曰嗣皇帝欲市恩於師傅高宗色動顧誥曰汝在軍機刑部久是於律意云何誥叩頭曰聖主無過言高宗默然良久曰汝大臣也善爲朕輔導之乃以他事罷珪之召時大學士懸缺久難其人高宗謂劉墉紀昀彭元瑞三人皆資深墉遇事模稜元瑞以不檢獲愆昀讀書多而不明理惟誥在直勤勉超拜東閣大學士明詔宣示俾三人加愧勵焉命總理禮部仍兼管戶部事二年丁生母憂特賜陀羅經被遣御前侍衛額駙豐紳殷德奠醑誥旣以喪歸川楚兵事方亟高宗欲召之每見大臣數問董誥何時來逾年葬母畢詣京師和珅遏不上聞會駕出誥於道旁謝恩高宗見之喜甚命暫署刑部尙書素服視事

不預典禮專辦秋讞及軍營紀略且曰誥守制已逾小祥不得已用人之苦心衆當共諒尋以王三槐就擒與軍機大臣同被議叙四年春高宗崩和珅伏誅命誥復直軍機管太子太保既服闋授文華殿大學士兼刑部尙書如故高宗山陵禮成命題神主管太子太傅七年三省教匪平予騎都尉世職十二年高宗實錄告成詔以誥在館八年始終其事特加優獎賜其父邦達入祀賢良祠十四年萬壽慶典晉太子太師充上書房總師傅十七年晉太保十八年扈從秋獮林清逆黨突入禁城時回鑾中途聞變有議俟調大兵成列而後進者誥曰是滋亂也獻俘者行至矣即日扈駕進次人心乃定窮治邪教誥謂燒香祈福愚民無知率所常有惟從逆者不可貸凡論上皆以是定讞林清既誅滑縣逆匪尋平論功迭被優叙賜子滿魯郎中二十年因病請致政溫詔慰留改管兵部未幾復命管刑部二十三年再疏乞休許致仕食全俸是年十月卒贈太傅上親奠入祀賢良祠賜金治喪御製詩輓之嘉其父子歷事三朝未嘗增置一畝之田一椽之屋命刻詩於墓以彰忠藎諡文恭誥直軍機先後四十年熟

於朝章故事有以諮者無不悉凡所獻納皆面陳未嘗用奏牘當和珅用事與王杰樁柱其間獨居深念行處幾失常度卒贊仁宗殲除大憝及林清之變獨持鎮定尤爲時稱云

朱珪字石君順天大興人先世居蕭山自父文炳始遷籍文炳官厓盤知縣曾受經於大學士朱軾珪少傳軾學與兄筠同鄉舉並負時譽乾隆十三年成進士年甫十八選庶吉士散館授編修數遇典禮撰進文冊高宗重其學行累遷侍讀學士二十五年出爲福建糧驛道擢按察使治獄平恕以父憂去三十二年補湖北按察使會緬甸用兵以部署驛務詳慎被褒獎調山西就遷布政使署巡撫疏請歸化綏遠二城穀二萬餘石搭放兵糧以省採買免紅朽又免土默特蒙古私墾罪以所墾牧地三千餘頃許附近兵民認耕納租歲六千餘兩增官兵公費又太僕寺牧地苦寒改徵折色以便民除弊皆下部議行珪方正爲同寮所不便按察使黃檢奏劾讀書廢事四十年召入覲改授侍講學士直上書房侍仁宗學四十四年典福建鄉試次年督福建學政瀕行上五箴於仁

宗曰養心曰敬身曰勤業曰虛己曰致誠仁宗力行之後親政嘗置左右五十年擢禮部侍郎典江南鄉試督浙江學政還朝調兵部五十五年典會試出爲安徽巡撫皖北水災馳驛往振携僕數人與村民同舟渡振宿州泗州碭山靈璧五河盱眙餘災輕者貸以糧種築決隄展春振並躬莅其事民無流亡五十九年調廣東尋署兩廣總督授左都御史兵部尙書仍留巡撫任嘉慶元年授總督兼署巡撫珪初以文學受知泊出任疆寄負時望將大用和珅忌之授受禮成珪進頌冊因加指摘高宗曰陳善納誨師傅之職宜爾非汝所知也會大學士缺詔召珪卒爲和珅所沮以廣東艇匪擾劫閩浙責珪不能緝捕寢前命左遷安徽巡撫皖北復災親治振官吏無侵蝕三省教匪起安徽亦多伏莽珪曰疑而索之是激之變親駐界上籌防禦徧莅額毫所屬集鄉老教誡之民感化境內迄無事明年授兵部尙書調吏部仍留巡撫任四年正月高宗崩仁宗即馳驛召珪聞命奔赴途中上疏略曰天子之孝以繼志述事爲大親政伊始遠聽近瞻默運乾綱籌施渙號陽剛之氣如日重光惻怛之仁無幽不浹修

身則嚴誠欺之界觀人則辨義利之防君心正而四維張朝廷清而九牧肅身先節儉崇獎清廉自然盜賊不足平財用不足阜惟願皇上無忘堯舜自任之心臣敢不勉仁義事君之道至京哭臨上執珪手哭失聲命直南書房管戶部三庫加太子少保賜第西華門外時召獨對用人行政悉以諮之珪造膝密陳不關白軍機大臣不沽恩市直上傾心一聽初政之美多出贊助尋充上書房總師傅調戶部尙書詔清漕政禁浮收疆吏以運丁苦累仰給州縣州縣不得不取諸民於是安徽加贈銀江蘇加耗米珪謂小民未見清漕之益先受其害力爭罷之令曹司凡事近加賦者皆議駁長蘆鹽政請加增鹽價駁曰蘆東因錢價賤已三加價矣且免積欠三百六十萬兩餘欠展三年商力已寬無庸再議加價廣東請濱海沙地升賦駁曰海沙淤地圯漲廢常故照下則減半賦之今視上中田增賦是與民計微利非政體且民苦加賦別有漲地將不敢報墾不可行倉場請預納錢糧四五十倍準作義監生駁曰國家正供有常經名實關體要於名不正實必傷斷不可行凡駁議每自屬稿奏上皆題之五年兼署

吏部尙書先是彭元瑞於西華門內墜馬珪呼其輿入昇之爲御史周枋所劾尋有珪輿人毆傷禁門兵忌者嚇護軍統領訐之詔珪素恪謹造次不檢特申戒坐褫宮銜解三庫事鐫級留任七年協辦大學士復太子少保尋兼翰林院掌院學士晉太子少傅九年上幸翰林院聯句賜宴御書天祿儲才額刻懸院中以墨書賜珪家十年拜體仁閣大學士管理工部上以是命遵高宗諭遣詣裕陵謝逾歲年七十六以老乞休溫詔慰留賜玉鳩杖命天寒間二三日入直未幾召對乾清宮眩暈扶歸第數日卒上親奠哭之慟贈太傅祀賢良祠賜金治喪詔珪自爲師傅凡所陳說無非唐虞三代之言稍涉時趨者不出諸口啟沃至多揆諸諡法足當正字而無愧特諡文正又見其門庭卑隘清寒之況不減儒素命內府備筵遣皇子加奠啟殯日遣廣郡王永璘祖奠日送逾年上謁西陵珪墓近蹕路遣官賜奠高宗實錄成特賜祭撫長子錫經爲四品京堂二十年復因謁陵回鑾親奠其墓恩禮始終無與比珪文章奧博取士重經策銳意求才嘉慶四年典會試阮元佐之一時名流搜拔殆盡爲士林宗仰者數十

年學無不通亦喜道家嘗曰朱子注參同契非空言也

論曰君子小人消長之機國運繫焉王杰董誥朱珪皆高宗拔擢信任之臣和  
珅一再間沮卒不屈撓一旦共驢伏法衆正盈朝據其忠誠啓沃新主殄寇息  
民苞桑永固天留數人弼成仁宗初政之盛可謂大臣矣



清史稿

列傳一百二十八

慶桂

劉權之

戴衡亨

戴均元

托津

章煦

盧蔭溥

慶桂字樹齋章佳氏滿洲鑲黃旗人大學士尹繼善子以廕生授戶部員外郎充軍機章京超擢內閣學士乾隆三十二年充庫倫辦事大臣遷理藩院侍郎三十六年授軍機大臣居二載出爲伊犁參贊大臣調塔爾巴哈台哈薩克巴布克詭稱阿布勒畢斯授爲哈拉克齊偕阿布勒畢斯之子博普來貢馬慶桂以博普未至巴布克狡詐不可信斥之上嘉其有識曰尹繼善之子能如此朕又得一能事大臣矣四十二年授吏部侍郎調烏里雅蘇台將軍授正黃旗漢軍都統以病回京逾年授盛京將軍調吉林再調福州四十九年入覲授工部尚書仍直軍機調兵部逾年署黑龍江將軍時陝甘總督福康安赴阿克蘇安

輯回衆上以慶桂練邊事命帶欽差關防馳往甘肅暫署總督尋授塔爾巴哈台參贊大臣五十一年召授兵部尙書歷署盛京吉林烏里雅蘇台將軍五十七年廓爾喀平子議叙圖形紫光閣上親製贊兩淮鹽運使柴植私挪課銀彌補浙江鹽道庫藏命偕長麟赴浙按治得巡撫福崧婪索侵蝕狀職上福崧植俱伏法尋授荊州將軍逾年召授正紅旗蒙古都統命勘南河高家堰石工嘉慶四年授刑部尙書協辦大學士復直軍機授內大臣監修高宗實錄加太子太保拜文淵閣大學士總理刑部裕陵奉安禮成晉太子太傅管理吏部理藩院戶部三庫事七年三省教匪平以贊畫功予騎都尉世職賜雙眼花翎九年授領侍衛內大臣高宗實錄成賞紫韁晉太子太師十六年扈蹕熱河以骸疾免從行園子假回京十七年晉太保上念其年老罷直軍機處仍授內大臣慶桂性和平居樞廷數十年初無過失舉趾不離跬寸時咸稱其風度逾年命以原品休致給予全俸二十一年諡卒文恪

劉權之字雲房湖南長沙人乾隆二十五年進士選庶吉士授編修累擢司經

局洗馬四十三年督安徽學政預修四庫全書在事最久及總目提要告成以勞擢侍講五十年大考二等逾年擢大理寺卿遷左副都御史疏言大挑舉人多資緣請於事前一日簡派王大臣聞命即宿朝房以杜弊竇於是命在午門莅事御史監視護軍巡察步軍五城一體嚴查著爲令尋督山東學政五十六年擢禮部侍郎六十年典江南鄉試留學政嘉慶二年調吏部四年擢左都御史典會試疏言買補倉穀地方官奉行不善在本境採買不論市價長賤發銀四五錢花戶不願納穀惟求繳還原銀加倍交價富戶賄吏飛灑零戶轉得少派善良貧民深受其累官以折價入己仍無存米遇協濟鄰省令米商倉猝購辦發價剋扣起運勒措請飭遇應買補向豐稔鄰縣公平採辦不得於本縣苛派嚴禁胥吏舞弊又言社倉大半借端挪移管理首事與胥吏從中侵盜至歉歲顆粒無存以致殷實之戶不樂捐輸老成之士不願承辦請一律查禁詔聽之飭各直省嚴禁民得免累湖湘間尤稱頌焉編修洪亮吉上書王大臣言事懸直成親王徑以上達權之與朱珪未即呈奏有旨詰問自請嚴議上以權之

人品端正平時陳奏不欺寬其處分尋遷吏部尙書五年典順天鄉試六年命爲軍機大臣越一歲會川楚陝教匪戡定權之入直未久上嘉其素日陳奏時有所見登予褒叙在吏部久疏通淹滯銓政號平九年失察書吏虛選舞弊因兼直樞廷薄譴之調兵部十年以禮部尙書協辦大學士加太子少保軍機章京中書袁煦者故大學士紀昀女夫也入直已邀恩叙權之於昀有舊恩至是復欲以袁煦列薦同官英和議不合已中止英和密請晏見面劾權之瞻徇上不悅兩人同罷直下廷議革職念權之前勞降編修未幾擢侍讀遷光祿寺卿歷遷兵部尙書十五年協辦大學士典順天鄉試是年帝以秋獮幸熱河明年辛丑臺並命留京辦事拜體仁閣大學士管理工部復加太子少保十八年目疾乞假遣御醫診視會逆匪林清爲變事定朝臣衰病者多罷退詔以原品休致回籍給半俸二十三年卒於家年八十諡文恪

戴衢亨字蓮士江西大庾人父第元由編修官太僕寺卿衢亨年十七舉於鄉乾隆四十一年召試授內閣中書充軍機章京四十三年成一甲一名進士授

翰林院修撰典試湖北叔父均元兄心亨並居館職迭任文衡稱西江四戴尋命仍直軍機秋獮扈蹕射鹿以獻高宗賜詩美之累典江南湖南鄉試督山西廣東學政歷遷侍講學士嘉慶元年授受禮成凡大典撰擬文字皆出其手二年命隨軍機大臣學習行走以秩卑特加三品卿銜累遷禮部侍郎調戶部四年仁宗始親政衡亨以病乞假假滿兼署吏部侍郎六年擢兵部尙書兼管順天府尹戶部三庫川楚陝教匪以次削平以贊畫功屢荷優褒七年大功戡定詔嘉其知無不言言無不盡克盡忠悃加太子少保予雲騎尉世職九年失察順天府書吏盜印罷兼尹十年調戶部兼直南書房典會試十二年協辦大學士兼翰林院掌院學士典順天鄉試十三年偕大學士長麟視南河時河事日敝帝銳意整頓中外臣工議不一特命查勘籌議衡亨叔均元方以總河謝病家居許便道省視遂與長麟三疏陳治河要義斟酌緩急停修毛城鋪滾水壩復天然閘東山鱗閘壩以減黃濟運於王營減壩西增築滾壩石壩普培沿河大隄以淮揚境內爲尤急雲梯關外八灘以上接築雁翅隄以束水勢高堰山

肝石隄加築後戢土坡爲暫救目前之計徐辦碎石坦坡以護石工智禮二壩加高石基四尺以制宣洩疏上帝深隄之命嗣後考覈河工以爲標準十四年萬壽慶典晉太子少師衡亨性清通無聲色之好朝退延接士大夫言人人殊不置可否而朝廷設施有見之數月數年之後者柄政旣久仁宗推心任之給事中花杰疏論長蘆欠課衡亨方筦戶部議下鹽政覈辦杰乃劾衡亨與鹽商查有圻姻親餽送往來助營第宅不免徇庇又廷試閱卷援引洪瑩爲一甲一名有交通情狀薦周系英王以衡席煜姚元之入南書房與英和陰附結黨衡亨疏辨下廷臣察詢命二阿哥監視洪瑩覆寫試策無誤迭詔爲衡亨湔雪惟斥其令部員劉承澍在園寓具稿致招物議予薄譴鎡級留任坐杰污讎承澍漏洩降黜有差因調衡亨工部復以凡部臣有直軍機者遇交議同官每向探意旨事後輒相推諉特諭申儆焉十五年拜體仁閣大學士管理工部兼掌翰林院如故十六年春扈蹕五臺至正定病先回京尋卒年五十有七溫詔優卹稱其謹飭清慎實爲國家得力大臣親臨賜奠贈太子太師入祀賢良祠諡文

端子嘉端年甫十一賜舉人襲雲騎尉

戴均元字修原乾隆四十年進士選庶吉士授編修遷御史迭典江南北鄉試督四川安徽學政嘉慶三年由安徽任滿還京兄子衢亭先已超授軍機大臣故事大臣親屬任科道者對品迴避均元例改六部員外郎特命以鴻臚寺少卿候補累擢工部侍郎八年偕侍郎貢楚克扎布察視張秋運河及衡家樓決口工程歷戶部吏部侍郎十年南河黃流奪運高堰石工壞特命馳視籌度明年詔以湖河異漲高堰隄工賴先築子堰保衛無虞清水暢注河口積淤刷滌已復三分入運七分入黃舊制爲河事一大轉機嘉均元盡心宣防特復正副總河舊制授南河總督以舊督徐端副之在任三年堵合黃河周家堡郭家坊王營減壩陳家浦及運河二堡壯原墩築高堰義字壩拆修惠濟閘以減壩合龍加太子少保病乞解任尋愈因事降三品京堂授左副都御史督順天學政未幾遷倉場侍郎十八年秋河決睢州出爲東河總督詔以均元曾任南河許便宜調用工員責速堵合明年春以吏部侍郎內召途次擢左都御史尋遷

禮部尙書調吏部二十年協辦大學士逾年授軍機大臣充上書房總師傅二十三年拜文淵閣大學士管太子太保管理刑部二十四年河決武陟馬營壩自秋徂冬尙未啓工奉命馳視還報購料未集詔嚴斥在事諸臣以示儆二十五年七月從扈熱河甫駐蹕帝不豫嚮夕大漸均元與大學士托津督內侍檢御篋得小金盒啓鑄宣示御書立宣宗爲皇太子奉嗣尊位然後發喪泊還京因撰擬遺詔有高宗降生於避暑山莊之語誤引御製詩注樞臣皆被譴鎖級均元與托津並罷直道光二年裕陵隆恩殿柱蠹朽距修建甫二十年承辦工員俱獲罪均元以在事未久從寬罷管部務奪宮銜責同賠修工畢復之漳水北徙命均元馳視次年因漳水下流潰直隸元城紅花隄塞之則元城北境水無所洩不塞則山東館陶受其害復命均元往視議展寬舊有引河俾積水穿隄入衛水別就隄下新刷水溝挑成河道分流洩入館陶境築隄防溢復偕巡撫程祖洛勘上游議漳水自乾隆五十一年南徙合恒水後衛水爲所格阻頻年衝決由於合則爲患今漳水北徙與恒水分流入衛當因勢利導各完隄防



使漳垣不再合疏上詔從之四年予告回籍食全俸先是建萬年吉地於寶華峪均元相度選定帝敦崇儉樸命偕莊親王繇課協辦大學士英和監修而戒規制一從節減迨七年孝穆皇后梓宮奉安帝親視嘉其工程堅固營均元太子太師及是地宮有浸水上震怒嚴譴在事諸臣褫均元職逮京治罪擬重辟念其耄老免罪釋歸均元歷官五十餘年叔姪繼爲樞相家門鼎盛自在翰林數司文柄及躋卿貳典順天鄉試一典會試三晚歲獲咎家居世猶推爲耆宿二十年卒年九十有五

托津字知亭富察氏滿洲鑲黃旗人尙書博清額子乾隆中授都察院筆帖式充軍機章京累遷銀庫郎中改御史遷給事中嘉慶元年命解餽銀赴達州五年授副都統留治四川軍需疏請軍餽先一月預撥忤旨召回及至京於餽數軍事無所陳告褫職予頭等侍衛充葉爾羌辦事大臣七年調喀什噶爾參贊大臣復授副都統八年召爲倉場侍郎十年吏調部命在軍機大臣上行走偕直隸總督吳熊光往湖北按訊鹽法道失察岸商擡價及錢局鼓鑄偷減治如

律時總督白齡被訐在廣東索供應造非刑命托津偕總督瑚圖禮治其獄請  
褫白齡職十一年調戶部偕侍郎廣興按東河總督李亨特勒派廳員奪亨特  
職遣戍十二年偕侍郎英和按訊熱河副都統慶傑貪婪褫職遣戍十三年偕  
尙書吳璥勘南河先是雲梯關外陳家浦漫決由射陽湖旁趨海口疆臣河臣  
請改河道徑由射陽湖入海托津等疏言馬港口張家莊漫水西漾數十里始  
折歸北潮河如果地勢建瓴何以轉向西流北潮河已匯流數月水未消涸顯  
見去路不暢改道斷不可行請仍修故道接築雲梯關外大隄收束水勢較爲  
得力又言河口高堰各工因連河西岸堵築漫缺頭二壩門口較寬不能擎托  
暢注請速補築皆如所議行十四年往江南讞獄金山寺僧志學與王兆良爭  
墾沙地械鬪斃多人依律治罪請以蔣家沙洲歸公佃種歲給寶晉書院及金  
山寺租銀各千兩倉場書吏高添鳳舞弊通州中西二倉虧缺命偕福慶勘訊  
坐以姦吏飭法罪旣而部鞫添鳳復得私出黑糧領米狀托津亦以久任倉場  
譴責分賠浙江學政劉鳳詒代辦鄉試監臨有聯號弊偕侍郎周兆基少卿盧

蔭溥往按得實論鳳誥遣戍山西署布政使劉大觀勦前任巡撫初彭齡任性乖張偕侍郎穆克登額往按彭齡大觀俱被嚴議十五年擢工部尙書調戶部兼都統偕盧蔭溥往四川按事總督勒保寢匿名揭帖據實上聞罷勒保大學士職又偕府尹初彭齡往南河清查工帑十六年春兩江總督松筠調任命天津暫代尋回京加太子少保兼內大臣十八年扈蹕熱河教匪林清逆黨闖入禁城命托津回京察治林清就獲詔優獎授協辦大學士時匪黨李文成據河南滑縣山東直隸皆震動那彥成督師遷延未進托津往代既而那彥成連戰皆捷命托津赴開州大名督率提督馬瑜勦匪十九年授正白旗領侍衛內大臣拜東閣大學士管理戶部晉太子太保侍郎初彭齡劾兩江總督百齡江蘇巡撫張師誠受餽送布政使陳桂生冊報蒙混命偕尙書景安往按彭齡坐劾未實被譴二十一年那彥成前在陝甘總督任與布政使陳祁鄒賑事覺命托津往按那彥成逮京即代署直隸總督尋回京仁宗綜覈庶政知托津樸誠於行省有重事大獄率以任之無一歲不奉使命二十二年管理理藩院二十四

年萬壽慶典賜雙眼花翎紫韁二十五年仁宗崩於熱河避暑山莊事出倉猝托津偕大學士戴均元手啟寶盒奉宣宗即位尋因遺詔引事舛誤詔切責托津均元並以年老罷軍機大臣降四級留任道光元年命題仁宗神主晉太子太傅二年與玉潤堂十五老臣宴繪像御製詩有立朝正色之褒調管刑部以子婦乘輜入神武門中門坐治家不嚴奪紫韁雙眼花翎尋復之十一年致仕食全俸十五年卒年八十有一帝親奠賜金治喪贈太子太師祀賢良祠贈文定

章煦字曜青浙江錢塘人乾隆三十七年進士授內閣中書充軍機章京累遷刑部員外郎屢典鄉試督陝甘學政任滿仍留刑部改御史嘉慶六年擢太僕寺少卿詔以軍事方殷煦習機務仍留直七年三省教匪平始罷直供本職偕侍郎那彥寶往雲南按布政使陳孝升等冒銷軍需治如律歷太僕寺卿順天府尹十年出爲湖北布政使逾年擢巡撫十三年召爲刑部侍郎偕侍郎穆克登額往雲南按事貢生任澍宇誣訐官吏冒銷軍需不實論反坐授貴州巡撫

未至調雲南署雲南總督十四年調江蘇巡撫署兩江總督時議行海運下煦  
籌議疏陳不便寢之十七年入覲乞改京秩授刑部侍郎偕侍郎景安往直隸  
獄十八年河南教匪起直隸總督溫承惠赴勦命煦代攝尋擢工部尚書調  
吏部仍留署職捕教匪馮克善械送京師加太子少保十九年回京典會試山  
東金鄉竊賊聚衆拒捕巡撫同興以邪教餘黨聞煦偕那彥寶往鞠得狀依律  
論罪知州袁潔誣報褫其職上知山東吏治廢弛命煦等嚴察以聞遂勅同興  
玩泄以致地方凋敝倉庫空虛及布政使朱錫爵徇私廢公狀並褫職命煦署  
巡撫清查虧空尋以陳大文調任同治其事責煦議定章程疏言嘉慶十四年  
清查原奏虧銀一百七十九萬有奇今查十四年以前實虧三百四十一萬有  
奇十四年以後又續虧三百三十四萬有奇擬請清釐藩庫數交代定徵解分  
數以杜新虧立追繳及分賠限期催徵民欠以懲延宕覈減提款確查無著之  
虧以示體恤覈攤捐案據估變流抵產物扣抵先儘正項倉庫一律籌補軍需  
墊解查明方許列抵以防朦混凡十四條下部議行二十年偕侍郎熙昌往湖

北廣東江蘇安徽獄襄陽人吳煥章誣告易成元易朝登等勾結謀逆反坐論罪襄陽知縣查以焯濫押斃命遣戍雷州府經歷李棠誣訐兩廣總督蔣攸銑遣戍雷瓊道胡大成苛派屬員視職貴縣知縣吳遇坤刊書抵毀上官遣戍洋商盧觀恒濫祀鄉賢黜之江蘇知縣王保澄誣訐上官諱匿邪書遣戍阜陽捻匪糾搶殺人論如律二十一年調禮部尙書授軍機大臣調刑部管理禮部二十二年病免尋授兵部尙書協辦大學士兼管順天府尹事二十三年拜東閣大學士管理刑部萬壽慶典晉太子太保二十五年以足疾累疏乞休予告致仕食全俸居家久之道光四年卒諡文簡煦久任樞曹練習政事勲歷中外數治大獄晚始參樞務未久病去再起管部以盡心刑事京察特被獎叙焉盧蔭溥字南石山東德州人祖見曾康熙六十年進士官至兩淮鹽運使父謙漢黃德道見曾起家知縣歷官有聲爲兩淮鹽運使以罪遣戍復起至原官當乾隆中葉淮鹺方盛見曾擅吏才愛古好事延接文士風流文采世謂繼王士禎在揚州時屢值南巡大典歷年就鹽商提引支銷冒濫官商並有侵蝕至三

十三年事發自鹽政以下多罹大辟見曾已去官逮問論絞死於獄中籍沒家產子孫連坐謙謫戍軍臺蔭溥甫九歲貧困隨母歸依婦翁讀書長山越三年大學士劉統勳爲見曾剖雪乞恩赦謙歸授廣平府同知蔭溥刻苦勵學至是始得應科舉乾隆四十六年成進士選庶吉士授編修阿桂爲掌院激賞其才五十六年大考降禮部主事阿桂言蔭溥能事改部可惜帝曰使爲部曹正以治事也累司文柄典山西鄉試督河南學政嘉慶五年充軍機章京川楚軍事多所贊畫八年孝淑睿皇后奉安山陵故事皇后葬禮無成式禮臣所議未當蔭溥回直儀曹攷定禮文草撰大儀奏上如議行數隨大臣赴各省按事累擢光祿寺少卿十六年大學士戴衢亨卒仁宗以蔭溥諳習樞務數奉使有勞加四品卿銜命在軍機大臣上行走歷通政司副使光祿寺卿內閣學士十八年擢兵部侍郎調戶部扈從熱河會教匪起滑縣林清入犯禁城夜半聞報至行在而進機宜越日從駕還京事平優敘賜子本舉人二十二年擢禮部尙書調兵部上以蔭溥實心任事特加太子少保尋調戶部兼署刑吏兩部尙書二十

三年館臣撰進明鑑未合上意命蔭溥偕托津章煦英和和瑛爲總裁選擇翰林才識兼長者重加核改書成詔襲之工部主事潘恭辰監督琉璃窖不受漏規取吏嚴吏誣訐侵冒下獄恭辰貧而無援文書證據不得直罪且不測輿論憤之上微聞命蔭溥詳鞫得其狀釋恭辰實吏於法後恭辰至雲南布政使以清操名二十五年典會試會元陳繼昌故大學士宏謀元孫也鄉試殿試皆第一有清一代科舉得三元者惟乾隆中錢榮及繼昌兩人上製詩命蔭溥等廣和以紀盛事是年秋帝崩因撰擬遺詔不慎降五級留任尋調工部道光元年調吏部兼管順天府尹罷軍機大臣次年猶以直軍機久調任後亦能盡心加恩予優叙七年協辦大學士十年拜體仁閣大學士管理刑部十三年以疾乞休加太子太保食全俸十九年重宴鹿鳴晉太子太傅尋卒年八十贈太子太師諡文肅

論曰仁宗綜覈名實樞臣中戴衡亨最被信用衡亨亦竭誠贊襄時號賢相晚遭彈劾而睦注不移均元繼之卒以顧命嫌疑不安於位豈盈滿之不易居耶



慶桂劉權之並以老成雍容密勿托津章煦廬蔭溥則奉使出入數按事決獄寄股肱耳目之任因人倚畀蓋各有所專焉